



38. ԹՈՒՐԻՔՄԱՆ ՕՂԼՈՒ ՀԵՔԻԱԹ

Ժամանակով մի թագավոր է էղնում, էս թագավորը ունենում է մեկ թաք տղա: Էս տղեն ամեն օր էրթում է ավուղուշ:

Սի օր լալեն ասում է թագավորի տղին.— Հա՛, գու թագավորի տղա ես, համա քու խելքդ հեշ բան չի կռում: Դու չի հմար ես մեկնակ էրթում ավուղուշ: Հիրկուն որ էրթում ես տուն, ոտներդ կը ծեծես գետին ու կոսես: «Ես թագավորի տղա էղնիմ ու մինակ էրթամ ավուղուշ, յա ընձի հընկեր, յա թե չէ մեռնում եմ որ մեռնում եմ», թագավոր քեղի հընկեր կը դրստե:

Թագավորի տղեն հիբկուն գալում տուն, ոտներ ծեծում է գետին ու ասում հորը.— Ես թագավորի տղա էղնիմ ու մինակ էրթամ ավուղուշ, յա ընձի մի քանի ընկեր, յա թե չէ մեռնում եմ որ մեռնում եմ:

Թագավոր զարմանում է, թե էս ի՞նչ հանդիպավ էս տղին:

Ձէ, թագավոր սարախտան մի քանի լավ ղոչաղ ջահելներ թոփ էրեց քաղքի միջից, տվեց տղին, հելան լալի հետ գացին ավուղուշ:

Լալեն էլի էկավ թագավորի տղի մոտ.— Ղորդ որ դու թագավորի տղա ես, ամա խելք չունիս: Գնա՛ իրկուն թաղավորին ըսա թէ. «Յա ընձի իմ լման, չեշիտը, բոյը ամեն բան, մեկ տղա կը գտնիս, յա թե չէ՛ ես մեռնում եմ»:

Թագավորի տղեն իրկուն տուն էկավ նիաթ-միաթ կախած, ոտները գետին ծեծեց ու ըսավ.— Յա իմ չեշիտի, իմ բոյ ու բուսաթի-

լման մեկ տղա կը գանխս ընձի հընկեր, յա թե չէ ես մեռնում եմ, որ մեռնում եմ:

Թագավոր կոսե.— Տո՛ւ, ջանըմ, էս տղեն իր խելքը կորուցել է, էս ի՞նչ է ասում, ես չեմ իմանում:

Խոլասա, ճարը կտրում է հ'ելնում սարախտան կանչում է իր վաղիր նազիրներին, որ էս բանի ճարը գտնին: Թոփ էղան էկան, բերին թագավորի տղի պատկերը քաշեցին մեկ քանի հատ ու թագավորի նկարչիք հ'ընկան էրկրե էրկիր ման էկան, որ որդի որ գանին էդ պատկերի պես, քաշեն բերեն: Որն որ թագավորի տղի լման գտնի բերե, ինչ որ լեզուն պտտի թագավոր պտի տա:

Հ'ելան թագավորի մարդիկ, ամեն մեկ թարաֆ գնացին: Թագավոր էնենց թամբահ տվեց որ.— Վե՛վ որ առանց գտնելու գա, էնոր գլուխը կուտամ:

Առան իրանց թագավորի խազնեցեն բազում փարա ու հայտե գնացին:

Հ'ուրտե՛ որ մեկ տղա էին տեսնում քիչ թագավորի տղի լման՝ հանում էին պատկերները աշում էին: Էսենց շատ ման էկան իրանց էրկրի մեշ, թագավորի տղի լման չճարվա՛վ: Խոլասա էկան հասան, ինչունի թուրքման էլին: Էկան դեմ առան մեկ քաղքի: Քաղքից դուս տեսան մեկ տղա ու մեկ պզտիկ աղջիկ: Էդոնց որ տեսան, հանեցին թագավորի տղի պատկերը աշեցին՝ որ թագավորի տղեն ու էդ տղեն ինչըխ որ մեկ խնձոր էղնին կիսած, թե որ հ'իրար մոտ կայնած էղնին մարդ չի կոնա հ'իրարուց ջոկե:

— Այ տղա, դու հ'ո՞ւմ տղեն ես, ի՞նչ է քու հոր անուն:— Հարցնում է թագավորի մարդը:

— Աղա, մենք մի քասիր մարդու տղա ենք, ի՞նչ ես գրում մեր հոր ու մոր անունը: Վե՛վ գիտե էս քաղքի մեշ էնոնց անուն, որ քեզի էլ սալըղ տան:

— Թե որ էդենց է, այ տղա դու արի հ'առաջ հ'ընկի, էրթանք ձեր տուն:

Տղան ու էդ աղջիկ առնում են ձիավորին ու դյուզ էրթում են իրանց դուռը կայնում են: Դուս են գալում տան շենլիքը, աշում են, որ մի երեւի իշխան ձիով իրանց դուռ կայնել է: Ջարմանում են էդ աղքատ մարդիկ. «Հա՛յ հա՛յ, էս ինչըխ բան է, որ էս իշխան մարդ, էս սաղ քաղաք թողե, էկել է մեր դուռ, մենք աղքատ մարդ, մո՞նց պտի ըստոր տեղավորցնենք»:

— Բարե աղբեր, միսավիր չե՞ք պահում էս գիշեր:

— Աղա ջան, մենք աղքատ քասիր մարդիկ, մենք քեզի ի՞նչըխ տեղ տանք, ոչ յաթախ ունինք, ոչ ձիու տեղ:

Թագավորի մարդը հանում է մեկ բուռ օսկի տալում ու ասում է.— Առեք էս օսկին ձեզի, մեկ էս գիշեր ընձի ու իմ ձիուն տեղ տվեք:

Քասիր մարդ, մեկ բո՛ւռ օսկի. ինչքան որ կճուճ աման շաման ունեին, շարդ ու փշուր արին, սոխախը լցին ու ձիավորին տեղ տվին: Գնացին նստան գինշացան, հաց, կերակուր բերին, կերան: Օսկին շատ, քաղաքն էլ մոտ, ամեն բան էլ բոլ էր:

Վախտ անցավ, էդ մարդ ըսավ.— Բարեկամ, ես էս ինչ թագավորի լալեն եմ, էկած եմ, որ ձեր տղեն տանիմ թագավորին: Թագավոր ձեր տղեն հուզում է: Ձեզի մի ուր օսկի կուտամ:

Հերն ու մեր լացին թե.— Ինչըխ կըլլի որ մարդ, ինչքան էլ որ քասիր էղնի, իր էրեխին փարով ծախե, էն էլ մենք, որ էս մեկ թաք տղեն է, չի ըլլի որ չի ըլլի, մենք մեր տղեն չենք տա:

Թագավորի լալեն շատ համոզեց հորն ու մորը: Հերը քիչ կակղըցավ, ամա մերը շատ էր լալում: Մարդը բաշլալեց կնկան համոզել թե.— Ա՛յ կնիկ, շատ որ զոռենք, թագավորի հերսը գելնի ու զոռով կը քաշե կը տանի, համ տղեն մեր ձեռքից կէրթա, համ էլ փարեն¹, մենք թագավորի թե կարա՞նք օլրել, էլի լավ է, օսկին էլ առնինք ու տղեն տանք: Բալքի աստուծ էսենց էր կամք տեսե: Աստուծ չի կարա՞ էլի տղա տա:

Թագավորի լալեն հ՛ելավ առավ տղին ու դեմ էրեց էրկիրն ու գնաց: Էրթում հասնում է իր թագավորի քաղաք, տանում տղեն տալում է թագավորին: Թագավոր որ տեսնում է տղին՝ զարմանում է, գիտե թե իսկական իրա տղեն է, ասում է.— Հալալ էղնի քեզ լալա, էս մո՞նց գտար էս տղին, հո՞ւրտից բերիր:

— Թագավոր ապրած կենա, շատ ման էկա, գնացի հասա ինչունի թուրքման էլին, ընտից, մեկ աղքատ մարդու տղա էր, մեկ ուր օսկի տվի, բերի:

Հեգսի օրը թագավոր Թուրքման օղլուն մեկ ղաթ լավ հալավ կռել տվեց, իր քահլան ձիաներու միջից մե լավ ձի, մե ղաթմ էլ սիլահ տվեց, էնենց էղավ, որ յոթն օր մարդ աշխատեւ շէր կարա թագավորի տղից շոկե: Դրին թագավորի տղի հետ գնաց ավուղուշ:

Էսենց մեկ օր, էրկօր, մեկ շաբաթ, թե մեկ ամիս անցավ: Թուրքման օղլին էնենց ավուղուշի մեջ սորվավ, որ էլ հեշ ոչնչեն

¹ Բնագրում՝ «համ տղեն մեր ձեռքից կէրթա, համ էլ տղեն» (Մ. Կ.):

չէր վախենում: Շատ էլ ղվաթով էր, ինչի որ ձեռ էր քցում բերում էր ու շատ էլ կռիշ ու սրտոտ էր:

Օրրմ լալեն կոսե թագավորի տղին.— Դու թագավորի տղա ես, ամա ոչինչ չես հասկանում:

Թագավորի տղեն կոսե.— Ինչրիս թե ես ոչինչ չեմ հասկանում, յաղո՞ւզ:

— Էնենց, ոչինչ չես հասկանում, բալլու է որ էս Թուրքման օղլին, որ դու բերել տվիր, քեզնից համ խելքով է, համ էլ զոռբա՞ւ վաղ, քու հերդ որ մեռավ, էս տղեն քու թագավորութուն կառնի:

— Մո՞նց անեմ,— կոսե թագավորի տղեն,— որ էս տղից ազատվիմ:

— Ինչրիս կոնե՞ս, իրկուն էրթում ես թագավորի մոտ, կոսես թե. «էս տղին ինչրիս որ բերել ես տվեր, կորցնում ես էնենց էլ կորցրու, թե չէ, ես մեռնում եմ»:

Թագավորի տղեն իրկուն նիաթներ կախած գալում է տուն: Թագավոր աշում է, որ տղի նաշիաթը էլի տեղ չէ:

— Ի՞նչ է էղել որթի, էլի էգենց նիաթներդ կախել ես, չ'ըլլի՞ քեֆ շունիս:

— Ի՞նչ պտի ըլլի, էս Թուրքման օղլին, որ դու բերել ես տվեր, կորցնում ես, կորցրու, էնենց որ հեշ չերեա, թե չէ ես մեռնում եմ:

— Ա՛յ շանըմ, ա՛յ որթի, դու ասիր, ես էսքան ծախս էրի էգ տղին գտա բերի, հիմի էլ կայներ ասում ես կորու: Ախր ընչի՞ ես էգենց անում, չէ որ ես էլ մեղք եմ:

— Զէ, չ'ըլլի որ չ'ըլլի, ես մեռնում եմ:

Սարախտան, թագավորի ճարը կտրած, կանչում է Թուրքման օղլուն ու ասում է.— Որթի, էղ շորերդ էլ, էդ ձին ու էդ սիլահներդ էլ քեզի, դառի, գնա՛ քու հոր տուն: Ծա չեմ ղմշում քեզի վնասել, գնա՛, աստուծ քեզ հետ:

Տանում, Թուրքման օղլուն քաղքից հանում ճամբի է դնում:

Տղեն կանչում է իր աստուծ ու քշում ձին, էրթում է: Ամառվա շոքը սխմում է, ծարվութունից լեզուն չորանում է, անոթութուն էլ մեկ կողմեն, շուր չկա, բան չկա: Էրթում, էրթում տեսնում է որ հեռու մի ծառ է երևում, չորս բոլոր կանանչ չայիր, չիման: Քշում դուռ էրթում է, հիշնում է ծառի շվնքին, ձին կապում է ծառից, աշում է մեկ լավ պաղ աղբուր: Կուշտ խմում, դինշանում է, հաց ուտում ու պառկում ծառի շվնքին ու լավըմ քնում է:

Մենք խաբար տանք թագավորի տղից:

Լալեն էս անգամ էլի ասում է.— Հա՛, դու թագավորի տղա ես,

ամա քու խելքդ բան չի կռում: Դու հ'ուր թողեցիր Թուրքման օղլուն գնա: Գնա թագավորին ըսա թե. «Յա կը թողնիս էրթամ իմ հընկերին հասնիմ, յա թե չէ մեռնում եմ, որ մեռնում եմ»:

Թագավորի տղեն էրթում ասում է հորը.— Յա ընձի կը թողնիս էրթամ գտնիմ իմ ընկերին, յա թե չէ, ես մեռնում եմ:

— Այ տղա, դու, իմ էս ըխթիար վախտիս բան չմնաց որ իմ գլխին չ'բերիր: Մեկ, ահագին փարա խարշեցի էդ տղին գտա բերի, հիմի էլ փոշմեներ ես, ըսում ես էրթամ տղին գտնիմ: Ես չ'գիտեմ թե հ'որե՞նց անեմ քու հետ:

— Չես թողնում, ես էլ մեռնում եմ:

Թագավորի իլլաճը կտռվավ, հ'ելավ զորքով իր տղին ճամբու դնելու Մի հարկկա օսկի տվեց, քաղքից դուս հանեց ու ըսեց.— Թուրքման օղլին էս ճամբով գնաց, դուն էլ էդ ճամբով գնա:

Թագավորի տղեն իր հոր ձեռքը պագում է, մնաս բարով է ասում ու հայտե Թուրքման օղլու հ'ետևից էրթում է: էրթում, էրթում է, շատ ու քիչ աստուծ գիտե, էրթում աշում է, որ դուռ մի կանանչ շայրի մեջ մի ծառ է էրկում, մոտն էլ մի ձի կապած: Քշում, էրթում, աշում է, որ Թուրքման օղլին է քներ:

Ասում է. «Թե որ ըստուր զարթեցնեմ, վայ թե հ'ելնի ընձի սպանեմ»: Ահու չի զարթեցնում, ինքն էլ կռնակը տալում է էնոր կռնկին, ձին էլ կապում է ծառից ու պառկում է, քնում:

Դու մի ասեր, էդ տեղն, որ թագավորի տղեն ու Թուրքման օղլին քնել են, էդ տեղ հարամու տեղն է:

Հարամի բաշին հ'ելավ դյուրբին դրեց աչքին, աչեց որ էրկու ձիավոր իրանց ծառի տակ պառկել են: Կանչեց իր ընկերներուն, ըսավ.— Օձն իր պորտով, հավքն իր թևով, էս տեղերից չի կարա անցնի, էս ինչըխ է էղեր, որ էրկու ձիավոր էկեր, մեր սինոռը մտեր ու դինջ էլ պառկեր քնել են: էդ մարդիկ էրկու հոգի են, դուք ի՜շք հոգի, գնացեք, սպաննեք ու ձիերը առեք, արեք:

Հարամի բաշին իրեք ձիավոր ճամբեց. հեծան, էկան:

Թուրքմանի տղեն էլ իր քուն առնում, կշտանում, հ'ելնում աչքերը տրորելեն աշում, տեսնում, որ թագավորի տղեն լերդը իր լերդին է տվեր ու քներ է: Տեսնում է, որ վերևից էլ իրեք ձիավոր զիլ, դյուլ-գին դիպա իրանց կողմն են գալում, Թուրքման օղլին ասում է. «Ես թագավորի տղեն վախկոտ է, ես ըստոր հետ հ'ընկերութուն արել եմ, թե որ զարթեցնեմ, ես գիտեմ կը վախնա, ես մենակ, կանչեմ իմ աստուծն ու էստոնց հետ կուլիմ, ինչ գալում է գա»:

Հ'ելնում, ամեկուն մեկ թուր է քցում: Իրեքի գլուխն էլ թռցնում է, ձիերը բռնում, բերում կապում:

Հարամիք որ էկան հասան Թուրքման օղլու մոտ, հարամի բաշին էլի հ'ելավ գուրբին դրեց հ'աչքերին աշեց, տեսավ որ էն ձիավորներից մեկը հ'ելավ, իր ղավազների իրեքի գլուխն էլ կռեց, էն մեկը պառկած տեղից էլ չեկավ: Կանչում է հրնկերներին ասում է.— Մեր հրնկերներին իրեքին էլ սպանին, հեծեք էրթանք հավարի:

Հարամի բաշին իր հրնկերներով հեծան ձիանը, կրակի պես քշեցին, էկան, հասան: Թուրքման օղլին կանչում է իր աստծուն, քաշում է թուրը ամեն մեկու գլուխը մեկ դին է քցում, գալում նստում է թագավորի տղի գլխի վերև: Քիչ մնում է, թագավորի տղեն զարթնում է, տեսնում է շանդկներ ու ձիաներ, լեղին պառկում է:

Թուրքման օղլին ասում է.— Ի՞նչ ես վախենում, դու տղամարդ չե՞ս:

— Ես մո՞նց չը վախնամ, իմ գալու վախտ մեկ ձի էր, հիմի էղեր է օխտ ձի, օխտ էլ շանդակ:

Հ'ելան թագավորի տղեն ու Թուրքման օղլին հեծան ձիերը, հարամոց ձիերն էլ քաշ տվին ու դյուզ քշեցին դիպա հարամու մաղարեն:

էրթում մտնում են հարամու մաղարեն, աշում են որ, ի՞նչ աշեն, խազնա, մալ, դովլաթ: Հարամիք թալներ ու բերեր լցեր են հոգ: Մեկ քանի օր ըդտեղ կեցան:

Օրըմ թագավորի տղեն ըսում է Թուրքման օղլուն.— Ախպեր, ես թագավորի տղա, իմ հերը աշխրքի տեր ու ավլատ էլ չուներ, ես էլի քու խաթեր չ'մնացի, հ'ելա էկա, հասա քեզի, որ էրթանք աշխարք ման գանք, հիմի էկանք էս սարի գլուխ մնացինք:

— Դարդ մի անէր, ախպեր ջան, մենք ըստե չենք մնար, կէրթանք:

Հ'եգսի առավոտ հ'ելան, իրանց բավական օսկի, խազնա վերուցին ու հեծան ձիերը ու քշեցին: Շատ են էրթում թե քիչ, աստուծ գիտե, էրթում դեմ են առնում մի թմբի: Քշում ձիանը, հ'ելնում են դարի գլուխ, աշում են, որ մի լավ քաղաք է էրեվում: Քշում էրթում են դիպա քաղաք, մտնում են քաղքի մեջ, էրթում մի բարձր շուշարանգլի, սիրուն քոշկ ու սարայու մոտեն անցնում են: Թագավորի տղեն վեր է աշում, թե էս ինչ լավ շինութուն է, տեսնում է, որ մի սիրուն, անլման աղշիկ կախված է փանջարից: Աղշկա սիրունութունը որ տեսնում է թագավորի տղեն, խելքը գլխուց էրթում է, ձիուց

վեր է գալում, էսօր էս մեռեր, թե մի տարի հ'առաջ, հ'ընկնում է գետին:

Կեջգան գեջ տղի խելքը գլուխն էկավ, Թուրքման օղլուն ըսավ.—
Ես մեռնում եմ, որ մեռնում եմ:

— Ախպեր, քեզի ինչ էղավ, որ մեռնում ես, ախր ամեն ընչին
ղայտա՛ կա, էս ճամբի օրթա տեղ ես ի՞նչ անեմ:

— Ձէ, յա՛ էս փանջարից էրեացող աղջկան գուզես, յա թե չէ
ես մեռնում եմ:

— Ախպեր, լավ, հլա հ'ելի էրթանք մի տուն, հ'իջնենք, աջենք
ինչ ենք անելու, հարց ու փորձ անենք, աջենք հ'ո՛ւմ աղջիկն է,
հ'ումը չէ, հ'ետե հալբաթ մի բան կոնենք:

Քջեցին ձիանը էդ ահագին քաղքի մեջ, գացին մեկ աղքատ
պառավ կնկա դուռ իջան:

— Քալե՛, մեզի էս գիշեր մի տեղ չե՛ս տալում քնելու:

— Ձեր գլխին դուրբան, ես մեկ քասիբ պառավ, տեղ չունիմ,
բան չունիմ, գոմ չունիմ ձեր ձիերուն, ես ի՞նչըխ անեմ:

— Ա՛ռ քեզի մի բուռ օսկի, մեզի տեղ արա:

Պառավ օսկին որ տեսավ, ոտներ գետնից կռավ, իրանց էլ տեղ
արավ, ձիանուն էլ:

Հ'իրիկուն պառավ դնում քաղքի մեջ իր միսավիրների համար
լավ-լավ կերակուրներ է բերում, ուտում, խմում, դինջանում են,
հ'ետե Թուրքման օղլին ըսում է պառավին.— Քալե՛, դու մեր մերն
ես, մենք մի խորհուրդ ունինք քեզի պիտի ասենք, տեսնենք դու ի՞նչ
կըսես: Քաղքի միջոց անցած վախտ, մի սիրուն քոշկ ու սարայու
տկից անցանք, էդ տան փանջարից մի աղջիկ իրան դուրս էր քցեր,
էս հ'ընկերըս տեսավ թե չէ խելքը գնաց, հիմի դրեր է իմ վրես,
ասում է. չցա էդ աղջիկ ընձի գուզես, յա ես մեռնում եմ, հիմի մեր
բանը քեզի է հ'ընկեր, դու գիտես:

— Լավ, դու որ ընձի մեր ըսիր, էդ չաթին է, մոնց որ էղնի
պետք է չաբալամիշ էղնիմ: Էդ աղջիկը մեր թագավորի աղջիկն է,
հ'ուզեր են խանի տղին, հարսնածն էլ էկել է տանելու: Հ'եգուց տա-
նում են, որ էգենց է ընձի մեկ ղաթ իշխնի կնկա շոր առեք, ես էլ
էրթամ աղջկան տեսնելու: Քաղքի թոմարի հարուստների, իշխանների
ու վազիրների կնկրտիք էրթում են տեսնելու:

Հանում բուռըս օսկի էլի տալում են պառավին թե՛ գնա քոս
սրտի հ'ուզած հալավը կռել տուր քեզի:

Պառավը գնաց, մի ղաթ լավ էնենց հալավ կռել տվեց, որ քաղ-
քի օնշովի կնիկն էլ էգենց հալավ չուներ:

Պառավ իրկուն զուքվավ, էհրամը գլխին քցեց, դուռը գնաց թագավորի աղջկա օթխի դուռ կեցավ: Թախկ-թախկ դուռը տալում է, հ'ելնում դուռը բանում են, էրթում թագավորի աղջկա կողքին նըստում է: Վե՛վ է իմանում, որ աղքատ պառավ է: Աշում են խաս-խաս շորերին ու թոմրից վերև տեղ են տալում: Գալող իշխններին, վազիրներին կնկտիք թոմար գնացին, մնաց պառավն ու թագավորի աղջիկը:

Պառավը ասում է.— Թագավորի աղջիկ, ես քեզի մի բան կուսեմ, հմա վախենում եմ:

Աղջիկը կոսե.— Խոսիր, յազո՞ւզ ես վախենում:

Աղջիկն էլ հասկցավ ինչ օլաջախը:

— Սեր տուն էրկու ձիավոր են էկած,— կըսե պառավը,— քո փանջարի տկից անցած վախտ մոնց է էղեր թագավորի տղեն քեզի տեսեր է, հիմի ասում է. «Ես էն աղջկա համար մեռնում եմ»:

— Ա՛խ, քալե՛, հագա ե՛ս ինչըխ վառվում, էրվում եմ էն տղի հմար: Հիմի դու գիտես, հունարը մնաց քեզի: Ա՛յ, իմ էս շորերը լավ տեսնում ես, կէրթաս տղին կոսես թե, իսկ իմ էս շորերի պես մե ղաթ շոր կուե՛լ կուտա, կը հագնի: Շանց կտաս մորս գերեզմնի քումբեթը, թող էրթա հոն մտնի, հ'եգուց ես որ էկա հոն, կոսեմ թե՝ թողեք ես մտնիմ իմ մորս գերեզման ուխտ անեմ ու գամ, ընտի ես կմնամ, տղեն կէրթա իմ տեղ: էսենցով թե որ մի բան արինք-արինք, չարինք, ես էլ եմ մեռնում:

Պառավ հ'ելավ գնաց, որ թագավորի տղեն ու Թուրքման օղլին իրեն են բաքլայում:

— Ի՞նչըխ էրիր քալե,— հարցնում է Թուրքման օղլին:

— Մեր թագավորի աղջիկն էլ է մեռնում թագավորի տղի հըմար:— Ու պատմեց էդոնց, մոնց որ թագավորի աղջիկ թամրի՛հ էր արեր:

Թուրքման օղլին պառավի հետ հ'ելնում էրթում են չարսուից՝ ի՛սկ թագավորի աղջկա շորերից մե ղաթ կուում են Թուրքման օղլուն, հագըր են անում:

Թուրքման օղլին էրթում մտնում է թագավորի աղջկա մոր քումբեթը, հաքնում է շորեր ու թագ է կենում, ինչունի՛ հարսնածի գալը:

Սաբախտան շուտ քաղաքը թունդ է հ'ելնում: Յոթ ղաթ դահուլ զուռնա չալղի է անում, խանի բերած հարուրից ավելի ձիավորներ չիրինդ են խաղում: Քաղքի մարդիկ բիթուն թոփ էղան, թե էրթանք տեսնինք թագավորի աղջիկը հեռու էրկիր են տանում:

Հարսին բերին հեծուցին ձին: Մնաս բարով ասին, ու հայդե շտկվան իրանց ճամբով: Էրթում հարսնածը հասնում է հարսի մոր գերեզմանի մոտ: Հարսը ձիու գլուխը քաջում կայնեցնում է, ասում է.— Ես իմ խան կեսրարից մի խնդիր ունիմ անելու, թողնի, մտնիմ իմ մոր գերեզման պագեմ, վե՛վ գիտե աշխար է, մեկել էս էրկրներ պատահեմ թե չէ:

Կեսրարին ասում են, թե հարսդ էսենց մի բան է խնդիրք անում թե՛ մտնիմ իմ մորս գերեզմանը պագեմ:

— Լավ,— կոսե խանը,— թող էրթա, ձիավորներն էլ իջնին, քիչ գինջանան:

Թագավորի աղջիկը ներս է մտնում քումբեթը, մի քիչ մնում է: Էնոր տեղ Թուրքման օղլին հօնում է դուրս, էրթում նստում է հարսի ձիուն: Էդ վախտ ձիավորներից մեկը կոսե.— Խանը սաղ էդնի, մեր հարսը մանդր էր, հիմի իմ աչքին խոշոր էրեվաց:

Խանը հերսոտում ասում է.— Բերանդ կոռի գը, որ մաջալլահ ասես:

Հայտե, հեծան ձիեր ու քշեցին, գացին հասան իրանց քաղաք:

Սաղ քաղաքը թունդ է հօնում, թե խանի հարսնածը էկավ: Դահուլով, շալդիով տարան հարսին, խանի մեծ աղջկա տուն իշուցին: Խանն էլ իրեք աղջիկ ունեք, էրկուսը կարգած էր, պզտիկը ազապ էր: Խանի իրեք աղջիկն էլ թոփ էզան, էկան հարսին տեսնելու:

Թուրքման օղլու աչքը որ տեսնում է խանի պզտի աղջկան, խելքը գլխից էրթում է: Միտքը փոխում է՝ էդ աղջկան էլ ինքը փախցընելու: Գիշերը Թուրքման օղլին մեկել քուրերին թումրին ճամբու դրեց, ուր մոտ թողեց մե՛կ խանի պզտիկ աղջկան: Թումար որ գնացին, մնացին էրկուսը մինակ:

Հարսը ասում է տալին.— Մոնց լավ բան կէղներ, որ ախպորդ տեղ, դու էղներիր իմ նշանածը:

— Ախ,— կրսե խանի աղջիկ,— ես մոնց ուզում էի, որ դու տղա էղներիր:

— Դեհ,— որ էդենց է, արի մենք սրտով աղոթք անենք, բալթի աստուծ մեզնից մեկին տղա անե:

Հարսն ու տալը կեցան աղոթքի: Հարսը, որ Թուրքման օղլին էր, քիչ որ աղոթում են, դառնում հարցնում է խանի աղջկան.— Դո՞ւ մո՞նց ես, տղա չէղա՞ր:

— Չէ,— կոսե աղջիկը:

Մի քիչ էլ որ մնում են հարսն ասում է.— Վալլա հա ես բանըմ ըսիմ, տղա դառա:

հանի աղջիկ էնենց ուրախացավ, որ ուրախութունից հընկավ հարսի գիրկն ու մի սհաթ էլ իրարից չէին բաժնըվում: Քիչ մը հետո Թուրքմանի տղան կոսե աղջկան.

— Աղջի,— մենք էլ չենք կարա ըստե մնալ, մեր գլուխ կը կոե հերդ, արի, ըստից փախնինք: Ամա ճարը մնում է քեզի, որ դու էրթաս, հորդ ձիանոցեն էրկու լավ ձի բերես՝ հեծնինք էրթանք:

հանի աղջիկ էրթում է էրկու հատ քահլան ձի իր հոր ձիաներուց բերում է, էնենց ձի, որ ղուշը չէր կարա բռներ:

Հ'ելան հեծան, ու հայդե հարամու մաղարա, հ'ուր ես, էկանք դիպա քեզ:

Թագավորի տղեն էլ իրան նիշանածին մոր գերեզմընի վրայից փախուցեր տարեր էր էն մաղարեն: Թուրքման օղլին էգենց էր թամբի հարել:

Սարախտան շուտ ձեն ցրվավ սաղ քաղքի մեշ թե. «հանի հարսը, առեր է խանի աղջիկն ու փախել է», խանն էլ լոթը դաթ դահլ ղուռնով դալում էր, որ հարսին տաներ պսակ: Էս խաբարը որ լսեց՝ էրկինք դետին մթնեց, ծնկները թուլացան, էլ չկարաց տեղից ժաժ գալ: Խանը հրաման տվեց, որ ասկար հեծնի, ամեն թարավ էրթ.ս ման գալու:

Գալում է էն ձիավորը, որ նոր հարս բերած վախտը խանին կոսե թե. «խան, մեր հարսը պզտիկ էր, հիմի իմ աչքիս խոշոր էրեվաց»:

— Խան ողջ լինի, հըպա դու ընծի ասում էիր՝ բերանդ ցավում է, որ մաշալլահ ասես, հիմի ինչըխ էղավ իմ խոսքս, տեսա՞ր, որ ինչ որ էղավ էն քումբեթից էղավ:

Թուրքման օղլին ու խանի աղջիկ դյուզ քշում գալում հասնում են հարամու մաղարեն, հ'իջնում, ձիերը ներս են քաշում, էրթում աշում, որ թագավորի տղեն իր նիշանածի հետ դինջ պարկել է:

— Հե՛յ դտի, դորթ որ հում կաթնակեր իսնին էհտիրար չկա, հեչ որ չէ, մեկ ելնիմ կ'աշեմ, թե իմ ախպերս գալում է թե չէ:— էսենց Թուրքման օղլին իրան-իրան քիչ նեղացավ, հետև սիրտ հ'իշավ նստավ:

Մի քանի օր անցնում է, թագավորի տղեն ասում է. — Ախպեր, դու լավ գիտես, որ իմ հեր թագավոր է ու ուրիշ ավլատ էլ չունի: Ես թափեցի հորս սաղ կարողութուն հ'ելա ընկա քու հետենն էկա, արի հիմի էլ դու ընծի լսե, էրթանք իմ հորս քաղաք: Վատա էղնի ասսու առաշ, որ իմ հեր մեռած էղավ, քեզի իմ տեղ թագավոր նըստեցնեմ:

Հ'նչնում հազրում են հարամու ձիերը, ինչքան որ խազնա, մալ,
դովլաթ կար բարձան, առան ու շտկվան դեպի թագավորի էրկիրը:
Թագավորն ի՞նչ էր արած, ամեն ճամբու գլուխ մեկ մարդ դա-
րադու էր դրած, թե. «Վե՛լ որ իմ ագիս խաբարը բերեց իր կշռնոտով
օսկի կը տամ»:

Թուրքման օղլին ու թագավորի տղեն, լավ, հարուստ քարվա-
նով հասան հոր քաղքի մոտ: Խաբար գնաց թագավորին թե՛ շես
ասեր վալլահ, քու տղեն էկավ:

Թագավոր իր վազիրներով հառաջ գնաց: Գրկեց տղին ու Թուրք-
ման օղլուն, հարսներին առավ տարավ տուն: Հարսնիք արին, էր-
կըսին էլ զայտով պսակեցին: Թագավոր ծերացել էր, մեռավ:

Թագավորի տղեն երդում էր արեր, Թուրքմանի տղին թագա-
վոր նստեցուց, ինքն էլ էղավ լալա: Էն հին լալեն, որ էնքան օյին-
ներ էր խաղացեր, էնոր էլ գլուխը զարնել տվեց, քցեց ծովը:

Թուրքմանի տղեն էլ մարդ դրկեց, Թուրքման էլուց իր հոր ու
մոր բերեց, պատվով պահեց: Ինքն ու թագավորի տղեն էլ ինչումի
իրանց մահը սիրով ապրան իրար հետ:

